

01-July--2026

आकाशवाणी

खबरां विजय बजाज कोला,

पैहले खास-खास खबरां:-

1. केन्द्र सरकार ने विकसित भारत जी राम जी कनून दे तैहत मेहनताने दिआं संशोधित दरां अधिसूचित करी दित्तिआं न। एह दरां अज्जै थमां लागू होई गेइयां न।
2. प्रधानमंत्री नरेन्द्र मोदी होरें पच्छिम एशिया च बने दे हालात बारै कल ईरान दे राष्ट्रपति डॉ. मसूद पेजेशकियान हुं दे कन्नै टेलीफोन पर गल्लबात कीती।
3. जापान दिआं प्रधानमंत्री सनाए तकाइची त्र'उं दिनें दी भारत जातरा पर अज्ज संजा नमीं दिल्ली पुज्जडन।
4. मौसम विभाग ने आखेआ ऐ जे अगले द'उं दिनें दे दरान दक्खन-पच्छमी मानसून दिल्ली, हरियाणा ते पंजाब च पुज्जी जाने दी मेद ऐ।
5. फीफा विश्व कप दे राउंड 32 दे मैच च फ्रांस ने स्वीडन गी 3-0 कन्नै हराई दिता ऐ।
6. भारत ते इंग्लैंड बश्कार 5 मैचें दी टी-20 क्रिकेट श्रृंखला अज्जै थमां इंग्लैंड च शुरू होआ करदी ऐ। श्रृंखला दा पैहला मैच भारती समें मताबक रातीं 10 बजे चेस्टर ली स्ट्रीट च खेड्डेआ जाहग।

<><><><><><>

VB GRAMG Wage Rate

केन्द्र सरकार ने विकसित भारत जी राम जी कनून दे तैहत मेहनताने दिआं संशोधित दरां अधिसूचित करी दित्तिआं न। एह दरां अज्जै थमां लागू होई गेइयां न। ग्रामीण विकास मंत्रालय पास्सेआ जारी अधिसूचना मूजब, सबनें राज्यें ते केन्द्र शासित प्रदेशें च मेहनताने दिआं दरां बधाई दित्तिआं गेइयां न। मंत्रालय ने दस्सेआ जे पैहली बारी 300 रपे हर रोज दा अंतरिम आधार मेहनताना दर लागू कीता गेआ ऐ ते इस गल्लै गी पक्का कीता गेआ ऐ जे इस कार्यक्रम दे तैहत कोई बी अधिसूचित दर एहदे शा घट्ट नेई होऐ। राष्ट्री औसत मेहनताना, मनरेगा दे 298 रपे 80 पैसे थमां बधाइयै विकसित भारत जी राम जी दे तैहत 327 रपे 40 पैसे

हर रोज करी दित्ता गोआ ऐ। इस चाल्ली मजूरी दी दर च 10 फीसद शा मते दा औसत बाददा होआ ऐ। 21एं राज्यें ते केन्द्र शासित प्रदेशें च जित्थे पैहले मजूरी 300 रुपें शा घट्ट ही, उत्थे हुन नमियां दरां लागू होईं गेइयां न। उत्तर प्रदेश, बिहार, झारखंड, पच्छिम बंगाल, असम, अरुणाचल प्रदेश ते हिमाचल प्रदेश मजूरी दर च 15 शा 25 फीसद दा बाददा करने आहले राज्यें च शामिल न। मंत्रालय ने दस्सेआ ऐ जे अरुणाचल प्रदेश ते नागालैंड च तकरीबन साइदे 24 फीसद दा सबनें शा मता बाददा कीता गोआ ऐ। हरियाणा च हुन मजूरी दर 409 रपे, गोवा च 406 रपे ते केरल च 401 रपे हर रोजै दे स्हाबै मिला करग। सिक्किम दी उंचाई आहली ग्राम पंचैतें च एह दर 450 रपे रोज स्हाबै तय कीती गई ऐ। ग्रामीण विकास मंत्री शिवराज सिंह चौहान होरें इस संशोधन गी, ग्राएं दी समृद्धि दे माध्यम कन्नै, विकसित भारत दे लक्ष्य दी दिशा च ऐतिहासिक गैह करार दित्ता ऐ। उंनं आखेआ ऐ जे एह गैह गरीब कल्याण, अंत्योदय ते 2047 तगर विकसित भारत दी सरकार दी वचनबद्धता च मील दा पत्थर ऐ।

PM Iran President

प्रधानमंत्री नरेन्द्र मोदी होरें कल ईरान दे राष्ट्रपति डॉ. मसूद पेजेशकियान हुंदे कन्नै टेलीफोन पर गल्लबात कीती। राष्ट्रपति पेजेशकियान होरें श्री मोदी होरेंगी पच्छिम एशिया दे हाल दे घटनाक्रम बारै जानकारी दिती। प्रधानमंत्री मोदी होरें बक्ख-बक्ख पक्खें बश्कार बनी दी मजूदा सैहमति दा सुआगत कीता ते सबनें मुद्दें दा हल गल्लबात ते कूटनीतिक ज़रियें राहें कइडे जाने दे भारत दे रौंs पर बी लोs पाई। श्री मोदी होरें पच्छिम एशिया च स्थायी शांति ते स्थिरता सने समुंदरी ते कारोबारी ज्हाजें दी सुरक्षित आओ-जाई लेई कीते जाने ठोस जतनें पर बी बल दित्ता। ईरान दे राष्ट्रपति होरें रमानदारी, स्थिरता ते इलाकाई सैहयोग गी बढ़ावा देने च प्रधानमंत्री मोदी हुंदे व्यक्तिगत जतनें दी सराहना कीती। ईरान दे राजदूती दफ्तरै दस्सेआ ऐ जे गल्लबात दे दरान राष्ट्रपति पेजेशकियान होरें भारत च ब्रिक्स देशें दे ऊर्जा मंत्रियें दी बैठक दे सफल आयोजन पर संदोख बुज्झेआ। भारत दे कन्नै सरबंधत होर सशक्त बनाने दी ईरान दी वचनबद्धता गी फही पक्का करदे होई राष्ट्रपति पेजेशकियान होरें आखेआ जे दौनें मुखें दे सरबंध ऐतिहासिक विरासत ते आपसी आदर-सम्मान पर आधारित न।

<><><><><><>

PM and HM Doctors Day

प्रधानमंत्री नरेन्द्र मोदी होरें अज्ज डाक्टरें सरबंधी राष्ट्री ध्याइ दे मौके उपपर देशें दे सबनें डाक्टरें गी शुभकामनां दित्तिआं न। श्री मोदी होरें सोशल मीडिया पोस्ट च आखेआ ऐ जे डाक्टरें दी सख्त मेहनत ते प्रतिबद्धता, देशें दी सेहत सेवा दा आधार ऐ। उंनं आखेआ जे पिछले इक दहाके दे दरान देसैं च सेहत सेवा

प्रणाली मजबूत होई ऐ। तोंआई गृह मंत्री अमित शाह होरें बी अज्ज डाक्टरें सरबंधी राश्ट्री ध्याड़े दे मौके उप्पर सबनें डाक्टरें गी बधाई दिती ऐ। सोशल मीडिया पोस्ट च श्री शाह होरें आखेआ ऐ जे खरी सेहत ते सटीक इलाज सने बेहतर जीवन शैली दे बारे च जागरूकता पैदा करने च डाक्टरें दा समर्पण ते प्रतिबद्धता सेहतमंद समाज दे निर्माण दी बत पदरी करदी ऐ।

<><><><><><>

PM and HM CA Day

अज्ज चार्टर्ड एकाउंटेट दिवस बी मनाया जा'रदा ऐ। इस मौके उप्पर प्रधानमंत्री नरेन्द्र मोदी होरें सबनें चार्टर्ड एकाउंटेटें गी शुभाकामनां दित्तिआं न। श्री मोदी होरें सोशल मीडिया पोस्ट च आखेआ ऐ जे चार्टर्ड एकाउंटेट भारत दी आर्थिक जातरा च भरोसेमंद सांझेदार रेह न। पारदर्शिता ते पेशेवर उत्कृष्टता दे प्रति अपनी प्रतिबद्धता कन्नै चार्टर्ड एकाउंटेट देशै दी माली बवस्था गी सशक्त बनांदे होई उद्यमशीलता गी बढ़ावा दिंदे न ते निवेशकें च विश्वास पैदा करदे न।

तोआई गृह मंत्री अमित शाह होरें बी इस मौके उप्पर सबनें चार्टर्ड एकाउंटेटें गी शुभाकामनां दित्तिआं न। श्री शाह होरें सोशल मीडिया पोस्ट च आखेआ ऐ जे चार्टर्ड एकाउंटेट कनूनी अनुपालन दी माली कुशलता गी लगातार बधाइयै राश्ट्र दे आर्थिक विकास च जोगदान दिंदे न। उ'नें कामना कीती जे अज्जै दा दिन राश्ट्र दे प्रति उ'ंदे समर्पण गी होर सशक्त बनाग।

<><><><><><>

Japan PM -visit

जापान दिआं प्रधानमंत्री सनाए तकाइची त्र'उं दिनें दी भारत जातरा पर अज्ज संझां नमीं दिल्ली पुज्जडन। एह प्रधानमंत्री तकाइची हुं'दी भारत दी पैहली अधिकारिक जातरा ऐ। ओह कल प्रधानमंत्री नरेन्द्र मोदी हुं'दे कन्नै 16में भारत-जापान सलाना शिखर सम्मेलन च हिस्सा लैडन। एह सम्मेलन दपकखी सरबंधें दी समीक्षा ते उ'नेंगी सशक्त बनाने दा मौका देग। इस दरान इलाकाई ते आपसी हितै आहले वैश्विक मुद्दें पर बी चर्चा होग। साढ़े संवाददाता ने दस्सेआ ऐ जे भारत ते जापान दी दोस्ती सदियें थमां चलदे आवा'रदे सांस्कृतिक ते सभ्यतागत सरबंध ते लोकतंत्र दे सांझे मुल्लें पर आधारत ऐ।

<><><><><><>

Amarnath Security

जम्मू-कश्मीर च सलाना अमरनाथ जी यात्रा गितै सुरक्षा सनें लोडचदे सब्बै बंदोबस्त करी लैते गेदे न-जिंदे च कोई 55 ज्हार शरदालुएं दे ठैहरने दी बवस्था बी शामिल ऐ। 3 जुलाई गी शुरु होने आहली इस यात्रा गितै जम्मू थमां पैहला जत्था कल भगवती नगर आले आधार शिविर थमां रवाना होग। आकाशवाणी दे जम्मू संवाददाता ने जानकारी दिती ऐ कि उपराज्यपाल मनोज सिन्हा जेहड़े जे श्री अमरनाथ जी श्राईन बोर्ड दे अध्यक्ष बी हैन, ओ कल बड्डलै 4 बजे जम्मू थमां यात्रा दे पैहले जत्थे गी झंडी दस्सियै रवाना करगंन। 57एं दिनें दी एह यात्रा अतरु 3 तरीक गी पैहलगाम आहले पारम्परिक रस्ते ते गांदरबल जिले च बालटाल आहले छुट्टे रस्ते, दौने परा शुरु होग। प्रशासन आसेया शरदालुएं दे ठैहरने, खाने-पीने, सेहत दिक्खभाल, ट्रांस्पोर्ट ते साफ-स्वच्छता वगैरा दे लोडचदे सब्बै बंदोबस्त करी लैते गेदे न। पूरी यात्रा दौरान शरदालुएं गी जम्मू-श्रीनगर राष्ट्रीय जरनैली सिड़कै पर सख्त सुरक्षा निगरानी हेठ आंदा ते लैता जाहग।

<><><><><><>

Weather

दिल्ली, हरियाणा, पंजाब ते चंडीगढ़ च मानसून अगले दंऊ दिनें च पुज्जी जाने दी मेद दस्सी ऐ। कल मानसून मध्य प्रदेश दे केई हिस्सें छतीसगढ़, झारखंड, बिहार ते उत्तर प्रदेश दे किश हिस्सें च पुज्जी गया ऐ। तौआई मौसम विभाग नै अगले दो-त्रै दिनें लेई उत्तर प्रदेश, बिहार, मध्य प्रदेश, कर्नाटक दे समुंद्री इलाकें, कोंकण, गोवा ते कन्नै लगदे होई किश इलाकें च बड़ी तेज बरखा बरने दी चेतावनी जारी कीती गई ऐ। सिक्किम, असम, मेघालय, केरल ते पच्छिम बंगाल दे गंगा कन्नै लगदे इलाकें च बी करीब इस्सै चाल्ली दे मौसम दी मेद जताई गई ऐ। मैहकमा मौसम दा आखना ऐ कि अगले दो-त्रै दिनें दरान छतीसगढ़ ते उत्तर पूर्वी इलाकें च किश थाहरें गर्मी-लिशिकियै तेज बरखा ते अंधी-झक्खड़ बी झुल्ली सकदा ऐ।

<><><><><><>

FIFA -World Cup

फीफा विश्व कप दे राउंड 32 दे मैच च फ्रांस ने स्वीडन गी 3-0 कन्नै हराई दिता ऐ। एहदे कन्नै गै उन्ने आखरी 16एं टीमें च अपनी थाहर पक्की करी लैती ऐ। एहदे शा पैहले, नॉर्वे ने आइवरी कोस्ट गी 2-1 कन्नै हराइयै राउंड 16 च थाहर पक्की कीती। हुन नॉर्वे दा मुकाबला ऑंदे ऐतवारें ब्राजील कन्नै होग। मोरक्को, पैराग्वे, ब्राजील ते कनाडा बी राउंड 16 च पुज्जी गेदे न। राउंड 32 दे इक होर मैच च अज्ज राती साइडे 9 बजे इंग्लैंड ते कांगो आमने-सामने होइन।

<><><><><><>

T20 Cricket

भारत ते इंग्लैंड बश्कार 5 मैचें दी टी-20 क्रिकेट श्रृंखला अज्जै थमां इंग्लैंड च शुरू होआ करदी ऐ। श्रृंखला दा पैहला मैच भारती समें मताबक रातीं 10 बजे चेस्टर ली स्ट्रीट च खेड्ढेआ जाहग। दुआ टी-20 मैच शनिवारें मैनचेस्टर च होग। त्रीया मैच 7 जुलाई गी नॉटिंघम च, चौथा 9 जुलाई गी ब्रिस्टल च ते 5मां ते अखीरला मैच 11 जुलाई गी साउथम्पटन च खेड्ढेआ जाहग। इस श्रृंखला दे बाद, भारत ते इंग्लैंड बश्कार इक ध्याड़े आहले 3 अंतर्राष्ट्री मैचें दी श्रृंखला बी खेड्ढी जानी ऐ।

<><><><><><>

Women T20 Cricket

ऑस्ट्रेलिया आई.सी.सी महिला टी-20 विश्व कप दे फाइनल च पुज्जी गेआ ऐ। लंदन दे ओवल च कल पैहले सेमीफाइनल च उन्ने वेस्ट इंडीज गी 8एं विकटें कन्नै हराई दिता। पैहले बल्लेबाजी करदे होई वेस्ट इंडीज ने ऑस्ट्रेलिया दे सामने 126 रन्जें दा लक्ष्य रक्खेआ जेहदे परते च ऑस्ट्रेलिया ने छड़े 13एं ओवरें च 2 विकटां मुहाड़्यै लक्ष्य हासल करी लैता। आँदे ऐतवारें खेड्ढे जाने आहले फाइनल च ऑस्ट्रेलिया दा सामना दुए सेमीफाइनल दी जेतू टीम कन्नै होग। कल ओवल च दुए सेमीफाइनल च इंग्लैंड ते दक्खन अफ्रीका आमने-सामने होडन।

<><><><><><>

Hockey Junior Team

हॉकी इंडिया ने बेल्जियम दौरे लेई 22एं सदस्यें आहली जूनियर अंडर-21 मर्दे दी हॉकी टीम दी घोशणा करी दिती ऐ। मैच 5 थमां 18 जुलाई तगर खेड्ढे जाडन। एह दौरा इस बरें दे अखीरें च होने आहले एफ.आई.एच जूनियर एशिया कप हॉकी थमां पैहले तैयारी दा अहम चरण होग। भारतीय टीम दी कप्तानी अनमोल एक्का गी दिती गेई ऐ। भारत अपने अभियान दी शुरूआत 7 ते 8 जुलाई गी ऑस्ट्रिया दे कन्नै मैच कन्नै करग। एहदे परैन्त भारत दा सामना 10 जुलाई गी मेजबान बेल्जियम कन्नै होग।

<><><><><><>

Railways Vistadome

उत्तरी रेलवे नै श्री अमरनाथ जी दी यात्रा दे चलदे शरदालुणं दी सुरक्षा दा ध्यान रखदे होई अगले दंऊ महीने लेई विशेष विस्टाडोम रेलगड्डी दी आओ-जाई च कटोती करने दा फैसला लैता ऐ। एह विशेष रेल गड्डी जेहड़ी

पैहले कटड़ा ते बडगाम बश्कार चलदी ही, अज्जै थमां 31 अगस्त तोड़ी छड़ी बनिहाल ते बडगाम बश्कार चला करोग। एह फैसला यात्रा दी सुरक्षा गी लेइयै जम्मू-कश्मीर पुलसै दी सलाह पर लैता गेआ ऐ तां'जे शरदालुएं दी सुरक्षत आओ-जाई ते भीड़ प्रबंधन जकीनी बनी सकै। विस्टाडोम विशेष रेलगड्डी जेहड़ी कटड़ा बडगाम रुट पर चलदी ऐ दे दौने पाससै शीशे लग्गे देन तां'जे लोक सफर दौरान बाहरै दा खूबसूरत नजारा सखल्ले दिक्खी सकन।



Traffic Advisory

अमरनाथे दी यात्रा गी ध्यानै च रखदे होई ट्रैफिक पुलसै जम्मू-श्रीनगर राष्ट्रीय जरनैली सिड़कै पर गड्डियें दी आओ-जाई लेई ताजा दिशा-निर्देश जारी कीते न- जेहदे चलदे यात्रा जत्थें दी सुरक्षत ते निर्विघ्न आओ-जाई लेई किश बंदशां लागू रौहगंन। पूरी यात्रा दौरान शामी 7 बजे दे बाद कुसै बी बड्डी गड्डी गी काजीगुड थमां जम्मू आहली बक्खी ते जखैनी थमां श्रीनगर आहली बक्खी जाने दी इजाजत नैई होग। अज्ज हौलिए मोटर गड्डियें गी राती 11 बजे धोड़ी जरनैली सड़कै पर चलने दी खुल्ल ऐ।

कल जरनैली सड़कै पर यात्रा जत्थें दे लंघने दौरान होरनें गड्डियें दी आओ-जाई लेई बंधशा लागू रौहगंन। उआं उनें'गी बारी-बारी सिर चलने दी इजाजत दिती जाहग। यात्रिएं गी सलाह दिती जंदी ऐ कि जरनैली सड़कै पर सफर कोला पैहले ओह, रोजे दे रोज जारी होने आहली ट्रैफिक निर्देशें गी दिक्खी लैन।

